


**YAA KAA SAD ROON**



**WASAARADDA WAXBARASHADA  
XARUNTA WAXBARASHADA  
DADKA WAAWEYN**

**YAA KAA SAD ROON**

**WASAARADDA WAXBARASHADA  
XARUNTA WAXBARASHADA  
DADKA WAAWEYN**

"Yaa kaa sad roon" waa sheeko gaaban oo ka hadlaysa nin reer-guura ah oo socdaal ku tegey magaalada Muqdisho iyo waxya-abihii uu la kulmay.

Waxay kale oo xusaysaa mashaakilada ka jira nolosha miyiga sida cudurka hulumbaha.

Sheekada oo qaab wada hadal loo dhigay si sahlanna loo qoray, waxaa loogu talo galay ardayga weyn, gaar ahaan ardayda Xarumaha waxbarashada miyiga.

Waxa buugga qoray Jaamac Cawad Aadan.

Qoraalkiisa waxa gacan ka geystay

Madaxa Xarunta Waxbarashada Dadka Waa-weyn (XWDW) Max'ed Cabdulle Bariir.

Waxaa buugga garaacay Maryan Xasan Max'd.

Madaxa XWDW wuxuu guud ahaan u mahad-noqayaa dadkii qaybta ka qaatay soo saarridda buugga sida farshaxannada,

dabacayaasha iyo garaacaba. Wuxuuna  
gaar ahaan u mahadnoqayaa qoraha  
buuga

Madaxa XWDW  
Max'd Cabdulle Bariir

ε  
YAA KAA SAD ROON

Waxaa tuulo ka wada carraabay Mooge  
iyo Warsame oo isku duddo ah.

Intii ay sii socdeen, wuxuu Mooge la  
socodsiiyey Warsame in socdaal galay.  
Wuxuuna Mooge jeclaystay in uu Warsame  
kala sii dardaarmo reerkiisa.

Mooge: Waxaan beryahan ku taabayey in  
aan gaaro wiil aan adeer u ahay  
oo Xamar ka shaqeeya. Reerkuna  
wuu ciidan xun yahay. Wiilash-  
iina waxay ka soo lug-bixi  
waayeen geelii oo dhukaan lagu  
sheegay.

Una malayn maayo inta geela ka  
rimani in ay ilmaha sii sidi  
karayaan

Waxaana idinka maqnaadaa waa  
toban beri, haddii Eebbe idmo.  
Haddaba, inta aan maqanahay  
adiga ayaa Warsamow reerkii u

oday ah.

Warsame: Inkastoo anigaba socdaalkaaga

oo kale igu jirey, haddiise aad  
tegeysid, wixii aannu qabno ayuu  
reerkaagu nala qabi doonaa.

Dadaalna nagu yaraan maayo.

Haddii aad Xamar nabad tagtid  
inantii aanu walaalaha ahayn  
raadi naguna salaan.

xaalkayagana uga warran.

Una sheeg in hooyadeed soo  
eegayso.

Mooge: Taa aniga igu hallee.

Talo waata Ilaahe, waxaan jecl-  
ahay in aan caawa guureeyo.

Arrinina waa inoo sidaas.

Nabad galyo.

Nin waliba wuxuu u leexday gurigiisii.

Qaali oo xaaska Mooge ah, waxay hor-  
taagnayd a guriga.

Mooge: Reerku ma soo nabad hoydey.

Qaali: Belaayo ma ogin.

Wiilkiise aad ayuu u liitaa.

Oofwareenkiina wuu ku sii  
xumaaday. Qufacna ma kala gooyo.  
Inankaas yaan sidaas lagu eegan  
ee takhtar ha loo geeyo.

Waa haddii aynu hadal kala  
qaadanayno.

Haddii kalese darxumadaas ha u  
dhinto.

Mooge: Weligaaba belaayo waad saadin  
jirtey. Inankani belaayo ma  
qabo.

Wadaad quraan saara ha loogu  
yeero. Neef shilisna ha loo  
qalo. Ilaahbaana waxna dili  
kara, waxna noolayn kara.

Takhtarna naf ma celiyo.

Waxaad yeelayasaa sonkortan inoo  
kari.

Tashina wuu igu dhashay.

Qaali: (Markiiba kirligii ayey dabka saartay. Markii uu bislaaday ayey u keentay Mooge oo guriga sintiisa fadhiya).

Muxuu yahay tashiga kugu dhashy? Malaha guur ayaa ku galay oo xoolahan aan ku dhintay ayaa kuu been sheegay.

Mooge: Weligaaba meel aan loo jeedin ayaad ka fad-kudisaa.

Marka geel loo heesaayo ayaad gorayo u heestaa.

Waxa ku dilaya masayr, ee anigu hammaddaas ma hayo.

Waad la socotaa tirada ariga uu hulumbihii naga dilay.

Waxa kaloo maanta la ii soo sheegay in geeleennii la xergeeyey uu dhukaan ku dhacay.



Goolashii qaarkoodna waraabe dilay.  
 Xoolaha sannadkana cudurro ayaa ku  
jira. Duco iyo sakana naguma baa-  
 qan! Ilaahow noo fududee.

Waxa uu yahay tashiga igu dhashay,  
 waad aragtaayoo yar iyo weyn  
 weynnu arradannahay. Waxaan marka-  
 as goostay in aan caawa Xamar u  
 socdaalo. Wiilkii aan adeerka u  
 ahaa ee Maxamed aan wax innooga  
 doono.

Reer Warsamena waa idin kala soo  
 ballamay.

Arigana waxaan ka rabaa nooli.  
 Waxaan ku talo jiraa in aan  
 dhaqso u soo noqdo. Xoolahana  
 ha la dayac tiro.

Qaali: Reer Warsame ma waxay noo raaca-  
 yaan xoolaha. Sow adiga og inta  
 meesi ee inoo dareerta iyo ciidan  
 xumadeenna.

Waxbase iska hagraan mayno.

Hase yeeshee wiilka waa in aad  
takhtar u qaaddaa.

Mooge: Ma wiil buka ayaan ilaa iyo Xamar  
wadi karayaa? Ma isagaa jidkaba  
iska xejinaya. Meeshiisa looma  
dhaamo.

#### IMAANSHIHII XAMAR

Mooge wuxuu yimi Xamar. Laba  
maalmood ayuu la'aa Maxamed.  
Lacagtii uu la soo galayna waa  
laga xaday. Iyada oo naf silic  
lihi ku jirto ayuu helay gurigii  
Maxamed. Nasiib wanaag Maxamed  
ayaa markaas guriga ku jiray.  
Maxamed waa takhtar ka shaqeeya  
Wasaaradda Xannaanada Xoolaha.  
Maxamed wuxuu ka naxay diifta ka  
muuqatay adeerkii. Wuxuu markiiba

u waday makhaayad uu biil ka qaadan jiray.

Mooge markuu dhergay ayey isaga iyo Maxamed iswareysi bilaabeen.

Mooge: Magaalo ma sahlana! Ninkaygii geed iyo geed u kala yiqiin miyiga ayaa maanta ambaday.

Maxamed: Aniguba haddaan miyi tago waa ku dayoobi lahaa. Nin waliba degaankiisa uu qabatimay ayuu ku fiicanyahay. Sheekadaasi ha inoo dambayso. Hawlo ayaa isugaaya. Waxaad adeer iiga warrantaa xaaladdii reerka iyo ujeeddada socdaalkaaga.

Mooge: Waqtigan hadda lagu jiraa waa xagaa: Geedihiina wey caddaadeen. Meesha aan reerka kaga imi waxaan ka degnay naq yar.

Xooluhuna markii hore wey  
 noogu fiicnaadeen. Maalmo ka  
 dib ayaa dhinac kasta looga  
 soo guuray. Hayaanku wuu kala  
 go'i waayey. Xoolihii ayaa  
 dhinaca isku qabtay. Meel aan  
 degel horeba ahayn ayaa la  
 yagleelay. Ciiddiiba dhinaca  
 kale ayaa loo rogay.

Dhirtii sarena waxaa la tagtay  
 gudin. Xitaa maqashii ayaanu  
 u weyney geed aan harinno.

Waxaana dillaacay qaniin.

Xoolihiina waxaa galay cudur.

Mooyi inaad taqaanno iyo inkale  
 ee waxaa cudurkaas la yiraahdaa  
 hulumbe.

Arigii yaraana tarab-tarab ayuu  
 nooga laayey. Xoolihiina wey  
 sicir jabeen. Waxaana la isugu  
 baxay murux. Qaawanaan waxba

lama dhaamin. Waxaana dadka u  
cuslaa inankii caruurta u yaraa.  
Inankaas waxa ku dhacay oof-  
wareen aad u xun. Mana filaayo  
in aan naf ku gaarayo .

Waxaanan rabaa in aan deg-deg  
u noqdo. Waxtarna waanu ku soo  
moodnay. Haddaan subag kuu keeni  
lahaana, dayrtaba lama lulan.  
Gu'gii horena hadalkiisaba daa.  
Warna waa iga intaa.

Maxamed: Wuxuu ka xumaaday talo xumada  
adeerkii. oo ka xishoonaya  
in uu runta u sheego.

Ilmahaas bukana miyaad isbit-  
aal keeni kari weyday?

- Miyaanadse ogeyn in uu dadka  
intiisa kale sadhayn karo.

Hulumbaha markii xoolaha lagu  
 arkay miyaan kuwa jirran laga  
 soocin kuwa fayow?.ir halis ah  
 Hulumbuhu waa cudur halis ah oo  
 ku dhaca ariga, gaar ahaan idaha.  
 Waa cudur dhakhso ugu fida  
 ariga. Waxaa jeermiga fidiya  
 shilinta. Cudurku wuxuu  
 abbaaraa mindhicirka.  
 Arigana wuxuu u laayaa tarab-  
 tarab.

Mooge: Maxamed, adigoo aad u yar ayaa  
 iskuul lagugu daray. Ilaa  
 intii aad hanaqaaddaynna waxaad  
 joogtay magaalo. Haddaba,  
 waxa iga yaabiyey sida aad u  
 ogaatay cudurrada ku dhaca  
 xoolaha ee aad weliba iiga  
 aqoon badisiid, aniga oo ilaa

intii aan raad dhaqaajiyey  
xoolo ku dhex-jirey! Balse  
sii wad.

Maxamed: Sow ma ahi takhtar soo bartay  
cilmiga xoolaha. Waxaan ka  
baxay Jaamacadda Dalka,  
Kulliyadda Xannanada Xoolaha,  
Haddii aan cudurka kuu sii  
faah-faahiyo; wuxuu hulumbuhu  
leeyahay astaamo lagu garto  
iyo siyaabo looga hortago.  
Astaamaha lagu garto hulumbuhu  
waxay u kala baxaan laba qaybood:

- 1) Astaamo oogada ah: Waa asta-  
amo guud oo lagu arko neefka  
inta uu noolyahay. Waxaa  
kor u kaca xummadda neefka.  
Waxaa neefka buka lagu arki  
karaa duuf sanku awdi kara,

neefsashadana ciriiri gelin  
 kara. Neefku wuu iskojiyaa  
 taas oo ay ugu wacantahay  
 calool majiir. Neefka uu  
 cudurku hayaa badiba wuu  
 shubmaa, waxaana ka yimaada  
 ban jilicsan oo midabkiisu  
 doog yahay, dhiigna la socdo.  
 Idaha rimani badiba wey  
 dhiciyaan marka uu cudurku  
 ku dhaco. Neefka shubmaa  
 waxa badiba uu dhintaa marka  
 xummaddiisu hoos u dhacdo.

- 2) Astaamo gudaha ah: Astaam-  
 aha guduhu waa kuwo la  
 arko marka neefka hulumba-  
 ha qaba la dooxo, ka dibna  
 la baaro uur-ku-jirtiisa.  
 Mindhicirka waxa lagu arkaa  
 xinjiro. Waxa kaloo xinjiro  
 lagu arkaa xanjareerida.



Beer yaraduna wey barartaa.  
Hunguri-cadkuna wuu kogaa.

Mooge: Haddii aan ogaado astaamaha  
cudurka ee aad sheegtay, ha  
ahaadeen kuwo duleed ama  
kuwo gudeed. Maxaa aniga  
iiga kordhaayaa haddii  
aanan waxba ka qaban karayn?  
waa arrin Ilaahiya ah.

Maxamed: Wax weyn ayaad ka qaban  
kartaa. Marka u horraysa  
ee cudurka la soo sheego  
ayaad idahaaga oo dhan ka  
tallaali kartaa. Cudurku  
ilaa iyo hadda ma laha  
daawayn. Wuxuuse leeyahay  
ka hortag.

Ka hortagga cudurradu wey ka  
fiicantahay (daaweyntooda.

Tallaalku waa waxyaabaha ugu  
weyn ee lagaga hortegi karo  
cudurrada faafa qaarkood.

Tallaalka ka sokow, waxa jira  
siyaabo kale oo ay waddamada  
awoodda u lihi uga hortagaan  
hulumbaha. Waxay sun ku buufiy-  
aan meelaha lagu soo sheegay  
hulumbaha si ay u dabar-gooy-  
aan shilinta cudurka fidisa.

Adiga saddex arrimood ayaa  
kula gudboon. Tan kowaad waa  
xoolaha fayow oo aad ka talla-  
ashid cudurka adiga oo la  
kaashanaaya takhaatiirta xoolaha.

Tan labaad waa adiga oo kala  
sooca xoolaha buka iyo kuwa  
fayow.

Tan saddexaadna waa adiga oo  
ka guura meesha ay shilintu ka  
dilaacday kuna tarantay.

Waxaan kaloo kuu sheegayaa,  
xooluhu ma aha in ay idinku  
noolaadaan, waa in aad ku nool-  
aataan. Xoolaha aad haysataan  
haddii si habboon loo xannaan-  
eeyo loona manaafacaadsado,  
cidina idinkama sadroonaateen.

Adeer, lagaagama sheekaynaayo  
inta qoys ee ku cayrowday  
abaartii dabadheer.

Dadka ku geeriyoodayna ma yareen.  
Haddii gar-gaar deg-deg ah aan  
loo fidin lahaynna dad iyo  
duunyo wax kama hareen.

Miyaanay taasi idiin noqon  
tusaale aad waayo-aragnimo ka  
kororsataan. Xooluhu waa beer.

Beertuna mar bay ku fiicantahay  
in la guro ama la gooyo.

Haddii ay miraha bisili xillig-  
ooda dhaafaan wey xumaadaan.

Xooluhuna sidaas oo kale waxay  
leeyihiin xilli ay ku habboon  
yihiin in la gado.

Xoolaha lab, marka ay iib  
galaan ha la gado. Xoolaha  
dheddigna marka manaafacaad-  
sigoodu yaraado, ha la gado  
ama ha la qasho. Lacagta laga  
helana, inta la quuto mooyee  
inta soo harta, bangiyada ha  
lagu kaydsado ama wax macaash  
kaa soo gelaayo ha la geliyo.  
Nin kayd lihi ma cayroobo.

Waxa kale oo aan kugu kordhinayaa  
in ay jiraan xarumo wax lagu  
baro reer miyiga. Waxayna

xarumuhu ka furanyihiin gobollada  
dalkeenna qaarkood. Xarumahaasi  
waxay ku kala yaalliin Aboorrey,  
Guri-ceel, Boocame, Buraan iyo  
Wadaamogoo. Waa inaad ka qayb  
gashaa marka tababar ka furmo  
xarunta kuugu dhaw.

Inta aan kuu sheegay iyo ka  
badanba waad ka kororsanaysaa.  
Adeer, joog-joogga magaaladu  
waxba kuu kordhin maayo. Dhaqso  
isaga noqo.

Ninka leh makhaayaddan oo aan  
biil ka qaato ayaan lacag dayn  
ah kaaga qaadayaa. Wax aan kaa  
hagranaayana ma jirto.

Waxaan ahayshaqaale. Waxaan gaar  
ahaan u adeegaa idinka xoolo  
dhaqatada ah . Waxaan ku nool-  
ahay waa mushahar tirsan oo  
la idinka soo ururiyo. Waxaan

kaala dardaarmayaa inankii  
 bukay. Haddii aad naf ku gaarto  
 waa in deg-deg loo tusaa takhtar.

Mooge: (Isagoo lacagtii saluugaya iskana  
 ilaalinaaya in laga dareemo  
 ayuu kacay).

Waxyaabo iga diimoonaa ayaad  
 i tusaalaysay. Waxaana ila  
 gudboon talo.

Xarumaha aad tilmaamtayna hore  
 ayaan u maqlay. Midbaana noo  
 dhaw. Waxaana hore nalooga  
 siiyey war khaldan. Taladayna  
 ima dhaafayo tababar dambe oo  
 lagu qabto.

Berriba waan tegi lahaa ee  
 waxaan rabaa in aan arko  
 inantii Maryan ee Warsame Cali  
 la dhalatay. Kama tegi karo

oo waxaan Warsame uga sidaa  
farriin.

## NOQOSHADII MOOGE

Mooqe markii uu danihiisa ka  
dhammaystay Xamar ayuu socdaal  
isu diyaariyey. Alaabtiisii oo  
dhan ayuu soo diyaarsaday.

Alaabtiisu waxay ka koobnay  
dambiil buuxda oo afka ka  
tolan, lix salli iyo duub dhar  
ah oo duug u badan.

Wuxuu gacan qaaday Max'd, una  
sheegay in uu ambabaxayo.

Maxamed oo sagootiyaya ayaa u  
soo raacay Ceel-gaab oo baabuurta  
gobolkiisu ka baxdo, Ceel-gaab  
ma aha meel lagu sii dayn karo  
waayeel Xamar ku qariib ah.

Moogana sidiisaba waa ka cabsi  
qabay Ceel-gaab oo waa tii hore  
loogu xaday.

Markii ay Ceel-gaab yimaadeen  
waxay la kulmeen kaarigii baabuur-  
ka Mooge raaci lahaa.

Mooge waxaa uu isku adkeeyey alaab-  
tiisii markii loo rari lahaa,  
taxadar awgeed.

Maxamed halkaas ayuu ku maca-  
salaameeyey adeerkii, kalana  
dardaarmay wadihii baabuurka.

Baabuurka uu raacay wuxu ahaa  
kuwa badeecadda qaada oo aad loo  
raray, rakaab badanina fuushanaa.

Mooge safarku waa ku adkaa.

Waxa ku dhib ahaa fuulista iyo  
ka degista baabuurka. Marar  
badan oo kaadiyi qabatay waxa



uu ka xishooday in baabuurka  
 loo joojiyo. Waxa  
 kale oo uu nacaybsanayey meesha  
 uu fadhiyey oo caruur iyo dumar  
 muran badani u badnaayeen. Waxa  
 qaali ku ahaa oo lacag door ahi  
 uga baxday makhayadihii laga  
 cunteynayey.

Ugu dambeystii mooge degmadiisii  
 ayuu tegay. Waxa uu isla markiiba  
 u gudbay reerkiisii.

Goor barqo ah ayuu reerkii ku  
 soo baxay. Markiiba waxa dhegi-  
 hiisa ku soo dhacay sawaxan iyo  
 baroor. Guriga waxa hor tubnaa  
 koox dad ah.

Wuxuu markiiba ka dhex gartay  
 Warsame, wuxuuna dareemay in  
 wax dhaceen.

Mooge: Asalaamu calaykum.  
Sidee wax u jiraan.


Warsame: Calaykumu salaam.

Reerka geeri ayaa gashay.


Waxaannu iminka ka soo  
dareerray aaskii inankii  
aad jirrada ku ogeyd.

Qaalina waxa aannu ka soo kaxayn  
kari weynay xabaashii. Waxaan uga  
baqayaa in qalbigu wax noqdo.


Mooge: (Ilmo ayaa isku soo taagtay indha-  
ha Mooge. Wuuse kelyo adeegayey).  
Waa xaq! Waa xaq!  
Alla hortii waan hagraday.  
Talo xumana wey i qaadday.  
Waxaanse loo noqon doonin  
baryo aan eebbe igu qaban.



Riigta ay ka baxaan baabuurta gobolladu



Rugta ay baabuurto ka baxaan ee Ceel-gaab  
Muqdisho.



Odayaal ka tirsan gobolka Nugaal oo ka qaybgalay tababar lagu qabtay Xarunta Waxbarashada Reer-guuraaga ee Boocame.




Xerta Sh.Maxamed Rabiic koox ka mid ah oo  
daabacanaysa buugaag loogu talagalay xoolo  
dhaqatada,





Caari-dameer bal u sida qaysaska xoolaha ku  
dhaqda magaalada Muqdisho.




Xoolo la dhoofinayo.






Ari dibadda loo dhoofinayo.




Ari gaari lagu rarayo.




Gabar ka mid ah caano gadatada magaalada  
Muqdisho.



Gabar caano iibinaysa.




Kawaanka hilibka ee Muqdisho



Suuga xoolaha ee Wardhiigley





Baabuur keenay caano suuqa Bakaaraha-Mugdisho.



Dad caano ka gadanaya suuga Bakararaha ee magaalada Muqdisho.



Waxaa lagu daabacay X.W.D.W.1983